

AKASHVANI AIZAWL

REGIONAL NEWS BULLETIN

HEADLINES (EVENING)

1. Mizoram Sorkar chuan Mizoram Universal Health Care Scheme (MUHCS) hmangtu damlote enkawlina senso atan cheng vaibelchhe 115.29 a pe tawh.
2. Sorkar laipui hmalakna zinga mi PM Vishwakarma Haat 2026 chu vawiin khan Union MSME minister Jitan Ram Manjhi-a'n New Delhi-ah a hawng a, he hunah hian Mizoram atangin mi pathum an tel.
3. January ni 9 tlai lama Sihphir Neihbawi-a Quarry chimin a delh zinga ruang hmuh loh awm chhun Samal Chakma ruang chu vawiin chawhnu khan hmuh a ni.
4. Assam-a Cheng vch 6 leh nuai 950 chuang senga Kaziranga Elevated Corridor Project thawhna tur lung, Prime Minister Narendra Modi-a'n Nagaon dist-a Kaliabor-ah a phum.

<><><>

MUHCS

Mizoram Sorkar chuan Mizoram Universal Health Care Scheme (MUHCS) hmangtu damlote enkawlina senso atan cheng vaibelchhe 115.29 a pe tawh.

Sorkar hian MUHCS kalpuitu damdawi-in te hnenah January ni 16, khan Mizoram Universal Health Care Scheme Bill cheng Vbv 2.77 a pe chhuak leh a, MUHCS kalpui a nih tan April ni 1, 2025 atanga tun thla January ni 16, thleng khan Mizoram Health Care Society chuan MUHCS kalpuitu damdawi-in te hnenah damlo enkawlina senso Cheng Vbc 115.29 a pe tawh a, heng hi MUHCS kalpui damdawi-in hrang hranga damlo 68,022 enkawlina bill a ni.

Mizoram chhungah MUHCS Empanelled Private Hospital 15 awm tawhin, Aizawl-a hospital 7, Champhai-ah 2, Lawngtlai-ah 2, Lunglei-ah 3 leh Siaha-ah 1 a awm a. MUHCS Empanelled Private Day Care Centre 3 a awm mek bawk a ni. Mizoram chhunga sorkar damdawi-in zawng zawngah MUHCS hi hman a ni a, Mizoram pawnah empanelled hospital 27 leh Deemed empanelled hospital 12 a awm mek bawk a ni.

MUHCS hnuaiah hian kum 2025-26 atan sorkar hnathawk 36,324; Civil Pensioner 8,733; AB PM-JAY chhungkaw 2,20,463 leh a hranpaa pawisa chawia inziak lut (contributory) chhungkaw 20,213 an awm a, CSS leh grant-in aid hnuaia thawk inziak lut zat erawh hriat theih a ni lo ani.

<><><>

ROAD MAINTANANCE

Aizawl khawpui chhung kawngpui thawmthat hna thawh mek chu kumin April ni 15-ah zawh beisei a ni tih ZPM chuan an tarlang.

ZPM party thuchhuah tarlan danin, nizan khan ZPM Vice Pesident Pu C. Lalnunnema leh General Headquarters hruaitu thenkhat in Aizawl khawpui chhung kawngpui thawmthat hna thawh mek an tlawh a. Hna viltu PWD chuan tlawhtute hi lo dawngsawngin, nizan khan Bungkawh leh Nursery inkar thawh a ni a, mipui hriat atana pawimawh te an lo hrilh bawk a ni.

Pu C. Lalnunnema chuan, Chief Minister Pu Lalduhoma leh PWD Minister Pu Vanlalhlana te thahnem ngaihna zarah Aizawl khawpui kawngpui thawmthat hna lian ber an kalpui thei tih an sawi a. Thawktute chawl lova zan tairek thlenga viltu PWD chungah an lawm tih an sawi bawk.

Aizawl Road North leh Road South PWD hna vilnaa a khaikhawmtu ber Central SE, Pu Lalrinnggheta, Circle chuan tuna hna hi Aizawl kawngpui resurfacing project awm tawha lian ber a ni a ti a, km 83 thawmthat a ni dawn tih sawiin hna hi kum 2024-25 hmalakna niin, nikum April atang khan contractor-in a thawk tan a. Kum 2025-26 hmalakna-in km 20-30 hna a awm leh mek tih a sawi bawk a ni.

Bungkawh atanga Nursery thawh zawh a nih hunah Maubawk thleng meter 600 hna thawh chhonzawm a ni dawn a. Hnathawktu hi NIDIH, Silchar an ni a. Anni hian Aizawl kawngpui thawmthat hna 'package' hniha then chu hmun hrang hrang an thawk mek a ni.

<><><>

PM VISHWAKARMA HAAT 2026

Sorkar laipui hmalakna zinga mi PM Vishwakarma Haat 2026 chu vawiin khan Union MSME minister Jitan Ram Manjhi an New Delhi-ah a hawng a, he hunah hian Mizoram atangin mi pathum an tel.

Mahni kutkawih thiamna hmanga thil siam chhuah zuar chhuak zingah hian, Mizoram atangin Lalmuanpuii, Kawnpui bakah Aizawl district atangin C. Lalfakzuali leh Lunglei District atangin R. Lalremhlamawii te an tel a, an kutkawih thiamna hmanga an siam chhuah te an zuar a ni.

Akashvani News Aizawl zawhna chhangin Kolasib District atanga tel Pi Lalmuanpuii chuan, PM Vishwakarma Scheme chu tun hma atanga a hriat tawh leh kum 2023 khan a inziahluh tawh thu a sawi a, inchhung cheimawina bungraw hrang hrang a siam te chu kum 2017 atanga bul a lo tan tawh thu leh, kum 2024 November thla khan Aizawl Sipai Lammualah pawh a lo inzuar chhuak tawh tih a sawi bawk.

PM Vishwakarma Haat 2026-ah hian state leh UT hrang hrang atangin mi 117 in an thil siamte an pho chhuak a. Vawiin January ni 18 atanga January ni 31 thlengin nitin chawhma dar 10:30 atanga zan dar 10:00 thleng neih thin a ni ang.

<><><>

MOBILE APP

KTP General Conference 2026 lo awm tur puala siam Mobile Application chu nimin khan Saitual Prebyterian Kohhran Centenary Hall-ah tlangzarh a ni a. App hi Siruk Consultancy in inkhawmpui puala an siam a ni.

App-ah hian KTP General Conference mikhual thlenna tur Counter dinhmun hrang hrang dah a ni a, motor veivah dan tur kalhmang, inkhawmpui hun ruatna, thil bo leh

chhar bakah lehkha kal chhuak te dah a ni a, heng bakah hian inkhawmpui thlengtu chanchin dah a ni bawk.

Inkhawmpui Organising Committee chuan a thlawna Mobile App siamsaktu Siruk Consultancy Firms chungah lawmthu an sawi a, thalaiten tangkai taka an hman theih nan duhsakna an hlan bawk a ni.

Mizorama kohhran lian ber Presbyterian thalai inkhawmpui hi a vawi 65-na tur a ni a, February ni 26 atanga March ni 1 chhung hian Saitual Public Playground-ah neih a ni ang.

<><><>

AIR NEWS

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve ah Chanchinthar puan leh a ni ang.

<><><>

SIHPHIR QUARRY

January ni 9 tlai lama Sihphir Neihbawi-a Quarry chimin a delh zinga ruang hmuh loh awm chhun Samal Chakma ruang chu vawiin chawhnu khan hmuh a ni.

Puan tawh angin Sihphir-a Lalchangliana enkawl lai quarry chu chimin a hmuna hnathawk a an chhawrlai mi pahnihte chu in saseng an tumna lamah pakhat zawk Minipur lam mi nia hriat chu a delh a, damdawiin panpui a nih hnuah a boral a, pakhat zawk hi Synod Hospital, Durtlangah enkawl mek a ni. Quarry chim hian an thenawma Rody Zothanmawia Quarry-a hnathawk hnam dang pahnih a chhilh tel bawk a, quarry chimin a delh pakhat zawk Solen Tudu, kum 38 Jharkhan ruang chu January ni 14 tlai dar 4:30 khan hmuh a lo ni tawh a, hemi zan vek hian Sihphir thlanmualah vui liam nghal a ni. Vawiina Samal Chakma ruang hmuh hi an chenna in ah luh pui zawk a ni ang a, chumi zawh ah YMA Hall ah Post Mortem tih anih hnuah Salvation Army CO Durtlang in a vui ang.

Mizo danah Sihphir Neihbawi-a quarry chim hi kar khat a tlin tawh avangin a zawn hna chu Zirtawpni zan khan tihawp nimahse tlawmngaiin zawn chhunzawm hna thawhs zel a ni.

<><><>

TUIPUI FERRY

Lawngtlai leh Siaha inkara Tuipui Ferry Lei pawimawh tak, Siaha panna kawngpui Short Cut tak chu Zirtawpni khan hawn a ni a, tui a len lai chuan lirtheite chu Marboat hmanga kai pui thin a ni a, tuilian a ziaawm lai-in Thing hmanga Lei dawhkai thin a ni.

Kum 2025 hmalam zawng khan lei hi MADC huam chhunga Tuipui Ferry khuain an dawh thin a, lei hi LADC leh MADC ramri a awm anih angin LADC leh MADC Sorkar hotuten kum inchhawka indawh chhawk ni se an tih angin kumin hian Lawngtlai Council Veng Dinthar LIKKBK Local Church-in an dawh a, an enkawl zui nghal dawn a ni.

<><><>

KAZIRANGA CORRIDOR PROJECT

Assam-a Cheng vch 6 leh nuai 950 chuang senga Kaziranga Elevated Corridor Project thawhna tur lung, vawiin khan Prime Minister Narendra Modi-a'n Nagaon dist-a Kaliabor-ah a phum. Km 86-a thui tur he project hi National Highway project niin, Km. 35 chuan Kaziranga National Park a pal tlang dawn a, Nagaon, Karbi Anglong leh Golaghat dist-te a paltlang dawn bawk a ni.

Thu sawiin Pu Modi-a chuan Kaziranga chu nungcha humhalhna hmun chauh ni lovin Assam hmun pawimawh ber a ni, a ti a, Kaziranga chu UNESCO pawhin World Heritage Site-ah puangin tlawhtu pawh an pung chho zel a ni, a ti a, Kaziranga leh nungchate humhalh chu environment venhimna mai ni lovin Assam hmalam hun leh chhuan lo awm zel turte tan a pawimawh a ni, a ti bawk.

Prime Minister hian Kaliabor-ah vek hian Amrit Bharat Express rel thar 2 - Kamakhya-Rohtak Amrit Bharat Express leh Dibrugarh-Lucknow (Gomti Nagar) Amrit Bharat Express a vai liam bawk a ni.

